

Estd

1997

Z.B.Y.F. TAANGKO

(An Organ of the Zomi Baptist Youth Fellowship)

LOM - X1 : HAWM VII v MONTHLY BULLETIN v August 2010



A sunga thu omt

Laimai

SEMS, Kei' etna panin 01

Tg. Lian Muan Kham

Theihhuai thu pawlkhat 03

S. Zam Khan Thang

Khangno lawm zon'dan 04

Rev. Thang Khawm Pau

Thu tuamtuum 07

Kuate'n bang gen & Dahpihna cover in

EDITORIAL BOARD

Editor :

Awì Ngaih Lun

Joint Editors :

K.Lang Kap

Z.L.Thang

News Editors :

Rev. Cìn Khan Tuang

Sia Kham Suan Pau

Cir. Manager :

Mamuang

Tech. Assistant :

Tin Sawm Lian

ZBYFMAKAITTE (2008 - 2010)

President :

K.Lang Kap

Vice President :

Kham Suan Pau

Secretary :

Awì Ngaih Lun

Recording Secretary :

Z.L.Thang

Asst. Rec.Secretary :

Thang Lian Mung

Ex-Officio Member :

Rev.Suan Khan Thang

Committee Member te :

1. *Nang Sian Mung*

2. *Kap Go Thang*

3. *Thawng Za Muan*

4. *Khup Pau Ex-Hav*

5. *Tg. N.K.Hau*

**Taangko kum 1 tatman
Rs.30/-**

Editorial✍

Upna

“Upna nei i cih ciangin i muhtheih nailoh, i lamette ngah takpi ding, ci-in muanna lunsim neihna ahi hi” (Heb. 11:1).

Upna pen nam nih - leitung nuntak hun sung ading leh i sih khith cianga i kha ading, cih bangin kikhen thei hi. Abraham in Pasion sapna muang a, ngah takpi ding hi'ng cih upna nei-in kalsuan ahih manin ngah takpi hi. Noah in Pasion thugente mang ahih manin, tembaw kum 120 sung tawntung a bawlina hangin ganhingte leh a innkuanun suahtakta ngah uh hi. Numei paktat Rahab in upna tawh Israel mite na zindo ahih manin amah leh a innsunga omte in nuntak lawh uh hi.

Upna i neih leh sepna tawh a kizui ding hi a, sepna om lo upna pen a si hi (James 2:14-17). Hih atunga i gente in zong, sepna tawh a upna uh lakkhia kei uh leh, a upna uh bangmah a kimanna om lo ding hi.

Tuhun ciangin, thukham zuihzawhna hang hi loin, Upna hangin Pasion tawh a kipawl thei mite bek nungta ding hi (Gal. 3:11). Upna lo tawh kuamah in Pasion lungkimsak zo lo hi (Heb.11:6). Upna tak tawh thu a kinget ciangin Topa in cinate noptuamsakin, damsak dinga, mawhna a nei ahih leh zong a mawhna uh maisak ding hi (James 5:15).

Khristian nuntakna ah upna man lo om thei hi. Sawltak Paul in Timoti kiangah thu upna manlo a hilh mite a khawl nadingun thu na pia in (I Tim 1:3) ci hi. Tua-in thuhilhna man lo, upna man lo up theih nading a thu a hilh a omna hong theisak a, kidophuai mahmah hi.

Thuciam Thak hunah Upna in vangnei phadiak hi. I pumpi ading bek hi loin, i tawntung nuntakna, i kha ading vantunggam i tun theh nading ahi hi. Tua ahih manin i upna lenkipin, thu tuamtuan in hong nawk ciangin zong suk-hoi to-hoi loin, kip takin omin, tua upna a kidawk theih nadingin sepna tawh mapang ciat ni. - *Tin Sawm Lian*

KUATEN BANG GEN?

Bangci a le, Taangko tungtawnin a kizuakzuaq hangin khawng thei mahmah kei ve ung aw, kikhawng hak lua powder man mahmah tam lau ta... - *Mawite, L. D Kim & Cingtawng' innkuanpihte, Cpi*

Lawmte aw, na damdam uh hiam, Delhi lam pan zong hongphawk veve ka hi aw... - *Kap Lal Muan, Delhi.*

Mission Khawmpi lai ka pai loh khak ding lau lua ing, pai kei leng bel
- *Tg. Mungtawng, Champhai*

Lawmte aw, hihci ka om maimai hangin om maimai lo ka hi aw . he he... - *Tg. Kaptawng, N. Cpi*

Kei bel keiguak in lungkim mahmah lel ing e. - *Tg. P. K Khual, Cpi*

Khangnote aw kikhawmkhawm peuh leng a dangte bel hong piang tawm lel ding hi..- *Tg. Pau Lian, Cpi*

Taangko tungtawnin hong zawnsak vevua, kei bekin bel a ci thei nawn lo himai veng aw.
- *Tg. Nang Gin, C'long.*

Na ciil kei leh na lungkham ding hi.
- *Confusious*

Bangbang ahi zongin khangnote mah hong thalawp photphot leh Pawlpi anuam hi mai ve aw.
- *Pawlpi Upate*

Lungdam pihna

Vapar BYF makai ahi Tg. Thang Sian Lal (Lalno) in tunai in RIMS Zatoinn, Imphal ah sepna ngah thak cih kiza a, kilungdampih mahmah hi.

Nidangin antangin thu kingen a, tuhun ciangin thunget kitangin an kine ta hi. Kilehbulh ta hi.

- *Evan Zel Thang, Cpi*

U Lal, na zinkhiat zawh Taangko ah kidawk khaat lua ung, nuam nawn kei. Nong phawk kha diam, ko hong ngai mahmah ung... - *Mafel, Mamang, Ningtuai & Nuboih, Vapar*

Dahpihna

1. **H. L Rammawi** kum 33, s/o Kap Lian, Aizawl in July 30, 2010 in leitung nusia a, Aizawl Khawk sia Rev. Dai Do Thang in vuina hun zang hi.

2. **Lang Sian Khai** kum 21 s/o Pau Lian Mung, Ngaizawl khua in July 28, 2010 in leitung nusia a, Sia Thang Khan Khual in vuina hun zang hi.

3. **Ning Heh Don** kum 30 w/o Kam Pau, Vapar khua in August 3, 2010 in sunglam natna hangin leitung nusia a, August 4, 2010 in Rev. Suan Khan Thang in vui hi.

4. **Pa Tawng Khaw Lian**, kum 72, Vapar khua in Ashma natna hangin Aug 3, 2010 in leitung nusia a, Presbyterian Pawlpi in vui hi.

5. **Pa Gin Khan Dong**, kum 46, Lesenzo khua in August 3, 2010 niin leitung nusia a, Presbyterian Pawlpi in vui hi.

To

From :-

ZBC Office,
Bethel Veng,
Champhai - 796 321
Mizoram, INDIA

KEI' ETNA PANIN

- Tg. Lian Muan Kham
Union Biblical Seminary, Pune

Pasian hehpihna tawh hun tomno cik sung (kha 3 sung) *Sesih English Medium School (SEMS)* ah laihilhna hun ka nei hi. Sesih pen Zomite khua hi a, inn 230 bang om hi. Biakna 2 om in, ZBC leh Presbyterian (Mizo kama biakna) ahi hi. ZBC pen inn 60 bang om in, a dang teng pen Presbyterian ahi uh hi.

SEMS pen puah tak sa in, 2010 panin ZBC gambup in a kep kipan hi. Sanginn building pen daap tawh ki-umin, atung (roof) pen sikkang kikhuh zo pan hi. Class pen *Kindergarten (KG)* pan tan VIII ciang omin, sangnaupang pen 100 phial pha a, sangsia 8 in kem hi.

Kei hihlhna panin naupangte pen pattahhuai thei mahmahin mu ing. Tuma kum paisa hunin pilna deihna taktak pen nu le pate in nei lo uh a, tua ahih manin Sesih pen lai pilna ah na niam mahmah uh hi. Tangval leh nungak khawlai a vak muh ding tam uh a, khua pen nuamsa thei mahmah uh hi. Ciau a ngasa mehkhata mat theih uh leh, lungkim lel uh hi. Ahi zongin, nu le pate' lungsim nakpi takin kikhek ta-in, tate pil nadingin nakpi takin hahkat uh hi. Nidingin nu le pate in a tate uh B.A., M.A., B. Sc., etc, a zothei dingin lamem ngeilo uh hi. Hihte pen minam dangte adingin koih uh a, English zong

nam dangte siam ding bekin koih uh hi. Tu in hih bang ngaihsutnate in bei lam manawh ta hi. Neih man hilo in, tate lai theih ding ut manin Mangsang mah na zuansak tantan uh hi. Khuapi lamah koih dingin neih le lamin cin nai lo ahih manin, *SEMS* pen amaute adingin a kideenna munpi uh suak hi. Hih sanginn pen a masuan uh hong hipian ahih manin puah tak mahmah hi.

Tua ahih manin, *SEMS* pen Pasian in Mizogam Zomite a hong laptoh nadinga sanginn hoihtak khat ahih ding lametna ka nei hi. Ka lai hihlhna panin naupangte lakah lungsim hat pipi om cih ka mukhia hi. Mailam huna makai hoih pipi a suak thei ding zong tapi om uh hi. Ahi zong a pattah ding nu le pate in i pattah siam kul hi. A nihna ah, *SEMS* pen a khuasung a teng Zomite lungsim tangzaisak dinga van zat hoihtak hithei ding hi. Sanginn hoih takin puah hileng, India gam bek hi loin Kawlgam pan nangawnin hong zuan ding uh hi. Zomite munpi zong suak theilai ding ahih manin lungluthuai mahmah hi. Tuin ahih leh, Sanginn building hoihtak leh tangzai tak kizam a, Boarding zong kinei nai lo hi. Sangsia zong deih bang zo nailo a, ahi zongin hoih lam manawh zel hi. Sang fee pen khakhatin Rs 100 hi a, khuapi a kaksak zolote adingin zuattak mahmah ta hi.

Khat veivei nupi leh papi pawlkhat te'n, 'Noh, Murlente mahmah!' hong cithei zel uh hi. 'Murlente nong cihcih uh a lungsim hattuum hikei ve uh aw, a cihtak man uh hi' ci in kadawng zel hi. Na khangnote un Sesih nuam salua uh ahih manin, sau a tunglo ahi uh hi, ka cih pawl zong om hi. Lawhcing dingin cihtakna, thuakzawhna leh kuhkalna kism hi. Hihte pen khaahsua theih hilo hi. Nuamtaka B.A., M.A., pass sawm cih pen hi thei lo hi. Laisim pen *short-cut* theih zong hilo hi. Tan 10 sim pana, nungak min tam natheih luat leh, na kisik hun hong tung ding hi. Nang adinga a lauhuai Delilah hithei hi. *YMA Day* leh *Chapchar Kut* zang dinga sang kahna pan na teenna khua na delh gige leh lawhcinna in hong ngaklo ding hi. Tua ahih manin, nu le pate'n tate i pattahna ah zong, a lungkiat loh nading u'a lam i lahden pen a kism mahmah ahi hi.

I thulu ah lut kik lehang, sanginn hoih a kineih theihna dingin Inverter pen *Emergency need/The need of the hour* ahi hi. Sesih ah Electricity (mei) hoih het lo ahih manin, naupangte laisimna buaisak hi. Sanginn ah giakpih ding cileng zong, mei om lo zel ahih manin lem het lo hi. Tua ahih manin, Inverter pen a baih lama ngaihsut ding a ka ciamteh khat hi.



*Sesih English Medium School (SEMS),
Sesih, Mizoram*

Sanginn building thak sak nading in Sesih VC te in mun hohtak hong piazo uh a, *foundation stone* zong kiphutzo hi. Tua mun ah Sanginn i sak theih ciangin *boarding* bek hilo, *Printing Press* leh *Training Centre* tuamtuam i nei thei tading uh hi. *Computer Training Centre* leh *Vocational Training* tuamtuam munpi dingin kizang ding hi. Laisimna zong hong tangzai zawta ding a, Mizoram HSLC Top Ten a cing sangnaupang khawng kineita ding hi. Nidanga mite hong theih khak loh leh hong neu-ette pen, mite etteh i suak tading uh hi. Tua hun ding ka gal dot ciangin kalung bang damkhol hi. Tua hun ciangin Zomite bek zong hilo, i kiim i pama sanggamte nangawnin sanginn pen hong zuan ta ding uh a, sangnaupang zong hong tamin, sanginn pen amah bekin hong kivak (run) zo ta

ding hi. Ahi zongin hih pen kei dam sungin zong hithei, zong thei phanawnlo maithei ing. Kei lametna hi.

Zomite pilna munpi dingin muhkholhna a kineih laitakin, Pasion muang kawma nakhat peuhpeuh i sep ding kism hi. A tangtungsak thei Pasion hi a, a tangtunsak nadinga Pasion vanzat pen nang leh kei (Zomi a kici khempueh) i hi hi. Tua ahih manin i lungsim teng tawh i sanginn adinga i thum ding uh ahi hi.

Tu lianin Sanginn *curriculum* pen hoihzo nailo a, behlap ding tampi omlai hi. Music lam tawh hi in, banner teh dan, Paak bawl dan leh a tuamtuam khutsiamna lam tawh kisai hita leh kisinsakna hoihtak neih ding deihhuai hi. Bek thamloin, naupangte nopsak

theihna ding painting/games/activities pawlkhat i hel ding zong kisam lai hi. Ahi zongin tua hun ding pen sawtlai kha ding hi. I ngaklah luat manin tampi gen kha zel hang, tua teng tawh hial bawl phot ni.

THEIHHUAI THU PAWLKCHAT

- S. Zam Khan Thang, Vaikhawtlang

1. Min phat na ut leh huaihamna nusia in.
2. Tui to luan ngei lo a, thupha to len lo hi.
3. Sawma khat na piak kei leh Guta na hi hi.
4. Thautang sangin thungetna in muibunzaw hi.
5. Lai Siangtho limlangin nei le cin na siangden ding hi.
6. Buaina tawh na kipelh nop leh thuman tawh nungta in.
7. Sawma khat na piak kei leh Pasion a langpang na hi hi.
8. Pasion pen itna tawh kidim a, a thumanglote tungah heh hi.
9. Nuam taka sauvei nuntak na ut leh na nu leh na pa zahtak in.
10. Mibanglote simmawhna in a piangsakpa Pasion simmawhna ahi hi.
11. Pulpit pen mi tai nading mun hi lo a, Kha lam anvakna mun hizaw hi.
12. Na nu leh na pa na simmawh leh na ta in nang hong simmawh ding hi.
13. Mi na gensiat sangin a hoih lohna uh thu hilhin, phat bawl le cin hong it zaw ding uh hi.
14. Pasion thu a mang leh a mang lo na theih nop leh Lai Siangtho lim takin encian / sim in.
15. Pasion na deihna na a zat ding hi lo a, Pasion in nang a deihnana ah hong zat ding hizaw hi.
16. Mi tawh a kilem thei pha lote mi kiphasak hi a, kiniam khiata a lungnem mite in lawm hau hi.
17. Muhna tawh a kalsuante a muh nawnloh uh ciang cimawh uh a, upna tawh a kalsuante a tawp dongin pai uh hi.
18. Pawlpi sungah nang deihna na bulphuh leh, Pawlpi zawngkhal ding a, Pasion deihna na bulphuh leh Pawlpi thahat ding hi.
19. Nakpi a thu na nget ciangin Pasion hopih na hi a, Lai Siangtho lim taka na sim ciangin Pasion in nang hong hopih ahi hi.
20. Tehna man lo a zangte tungah Pasion hehin mudah a, tehna maan lo zang te'n mihuaiham ahinna uh a tehna uh pan kilangsak uh hi.

KHANGNO LAWM ZON'DAN

- Rev. Thang Khawm Pau

20th Century hong kipata kipan, leitungah nungak le tangvalte ki-it, kingaih le kiteen zia tampi hong kikheel mahmah cih i theihsa ahi hi. 'Innkuan' cih kammal pen pasal in zi a neih lohin ahih kei leh nungak in pasal a neih loin a piang tawm mawkmawk thei lo hi. Nuntakzia kithakpatna ahih mah bangin innkuan sung a nop theih na'ngin Pasion deihna tawh kituak nungak le tangvalte in i zon ding thupi masa hi.

I. Pasion' patkhiat innkuan (Pian. 2:18) :

Pasion bawl na khempeuh hoih mahmah hi napi-in, mihing (pasal) adingin kisam a sak khat om hi. A kithuahpih ding, a huh ding, lungsim kuppiah ding amah bangkhat kisam hi ciin Pasion in thei hi. Tua hi a, tua kisapna a thei Pasion lungnuam loin, pasal Adam adingin a kisapna vaihawmsak hi. Pasion tavuan piak ahi mihingte tawh leitung a kidim na'ng, a pun na'ng le leitung a uk na'ng uh numei loin piang thei lo ahih manin, Pasion in pasal ahuh ding; pasalpa' kisapna a dipsak dingin (I Tim. 2:14) numei na bawlsakin, innkuan cih na bawl hi. Hih pen Pasion' hong patkhiat ahi hi.

II. Pasion' piansak zia :

Zomite in numei kum sawmnihih bang a phak ciangin, nungak picingin tuat a, pasal khat kum sawmthum a phak ciangin tangval picing thei dingin kingaihsun hi. Pasion in mi khat a piankhit nak leh 'lawmngaih theihna' cih hong bawlsak a, numei pasal in i

neihkim thu khat ahi hi. Hong kingai maw, ngailo cih thu hi masa loin, 'vaangngaih' cih khat kinei masa ciat hi. 'Picin' hun a tunma-in, kikhel hun thupi tak khat pen numei le pasal pumpi sungah om hi. Hih hun thupi mahmah leh a lauhuai mahmah hun hi a, numei khuaval sim khat leh pasal ommawh sim khat hong kizop khak leh bel "aman lian" hi ding hi. Tua hi a, it-ngaih le duh-ngaih cih om ahih manin, tulai khangnote kidop mahmah ding kong theisak nuam hi.

Hong it taktak le hong iplah lelte theihnel nading :

Hong it taktakte in :

- * Zahtakna nei
- * A hoih hong deihsak,
- * Hong ngakzo hi.
- * Na innkuante hong itpih ding hi.

Hong iplah lelte in :

- * Hong maingalin hong ngaphawh gawp ding hi.
- * Hong susia nuam lel ding uh hi.
- * Hong kin tengtung ding hi.
- * Nang bek hong tang itin, na innkuante it lo ding hi.

Pawlkhate in na maitang bang hong en ngam lo zawzen ding a, lungsim tak tawh hong it peuh na hi thei ding hi. Pawlkhate leuleu in, ngaklah lua pongmawk uh ahih manin, kam zolin, ‘phalbi khuavot sung hi thei peuh leh’ hong ci henhan ding uh a, kin tengtung ding uh hi. A ki-kin luat leh a hoih lo lam hi zaw kha ngel ding hi. Tua hi a, na kin luat leh ‘leep se ding’ hi peumah lo hi. Numei na hih a thupitna le pasal na hih thhupitna kep siam in. A diakdiakin numeite na kidop siam kei uh leh khatvei khialhna-in khantawn minsiatna le maimawlna hi thei hi. Numei in, na numei hihna uh hoih taka kep ding kizam hi. Pasion in a siangtho a hong bawl hi-in, siangtho tak maha kep ding ahih lam mangngilh kha het kei in.

III. Pasion’ piakkholh thukhunte :

Lai Siangtho Lui Piansil 24 sungah i muh mah bangin, tuhun Lai Siangtho siksarin nei lecin na khial ngei kei ding a, innkuan nuam na nei thei ding hi :

1. Upna kibang (piangthak le piangthak) teel in.
2. Pasion muang in.
3. A pianzia, gamtat, luheek ngaihsun in.
4. Pasion hong piak lungpilna zang in.

1. Upna kibang teel in (2 Kor. 6:14&15) :

Tui leh sathau a kihel theihloh

zia, sathau sungso inla, tuivot sung lecin, tam geen kul loin thei ding hi teh. Piansil 24 ah Abraham in a tapa adingin, mihing nuntakna tawh a pasiante peuh uh a bia, numei pasal kithuahna a thaangtat, Kannan mite tawh a kiteen ding deihsak peumah lo hi. Tua ahih manin, amau omzia kitheia mite kiangah a mo ding a lasak hi.

2 Kor. 6:14&15 ah “Hakkol kibang lo” a cih pen, hakkolpi a gen hi loin, tua hakkol a pua ganhing kibang lo a genna hi zaw hi. Van a puakhawm ding, nasemkhawm dinge ahih mah bangin, na zi ding, na pasal ding zong na khantawn a na seppih, kikhohpih ding ahih mangngilh loh ding thupi mahmah ahihna hong hilh hi. Tampi gen kei leng, Lai Siangtho sungah hih mite : Samson (Thukhente 14:3); Solomon (I Kum. 11:4, Pasion um lo a zite in a lungsim kikhelsak zo zen hi); Ezra 9,10; Nehemia 13:23-27; Malakhi 21:11,12 te hoih takin sim in.

2. Pasion muang in :

Mihing nuntakna, i suah tung a kipanin, khat tanga kinungta hi loin, mi khat tunga kinga nuntakna ahi hi. I neu lei-in i nu i pa’ tung i kinga a, annek tuidawn leh puansilh nikteen ding amau hong sik, hong guat ding bek i ngak hi. Tua mah bangin nuntakna nak ahi Pasion tung

na khempeuh i ngak ding ahi hi. (Pau. 3:5-7).

Pasian na muan leh na “vai” Amah ap lecin, lungdam takin, a hoihipen hong panpih ding hi (Pau. 19:14). Leitung inn le lote pate’ tung pan hi-in, zi pil ahieh leh Topa bekin hong pia thei hi; ci hi. Zi hongpia Pasian na ci loin, “Zi pil” naci sese hi. “A pil” ci ahieh manin, a ‘hai’ om hi, cih kimu pah hi. Laitaan leh degree tampi neihna cih hi loin, ciimna, maikhuat theihna cih ahi hi.

3. *Gamtat huheek ngaihsun in :*

Na lungtang hong kheisak (operation bawl) dingin zu khamkham siavuan peuh na muangzo ding hiam? A tei, a siam, a minthang siavuan na teel zawk ding kong um hi. Piancial 24:13&14 ah, a kiniamkhiat, na nasempa’ lungsim bang a nei numei khat om hi. Kiniamkhiat, nasep hahkat numei, numei ahiehna siang tak a a keem nu ahi hi. Nang zong tua bang hi nuam in.

4. *Pilna zong in :*

Na khat na lei ding ciang, na teen nading mun nateel ciang le zi/pasal ding na teel ciang, Pasian lungsim zat ding ahi hi. Piancil 24 ah Issak zi dingin Rebekah a zon’ nading mun (24:3,4,10) thei-in, a muh theih nadingin Topa’ huhna na ngen hi.

Na lungsim Topa’ khutah ap inla, nang’ theihna, lim leh na lamdang pian peuh na lamet leh Pasian maiah koih masa kei in. Eliazer in Rebekah maiah tai loin, a tuidip laitak hoih takin en gige hi.

Pasian a it piangthak na muante tawh kikum inla, advise ngen in(v.49). Pasian a it, innkuan na hih ding thupi a, Pasian kihta uh ahieh manin Lai Siangtho hihna mang nuam pah ding uh hi.

Hih a tunga thute thupi ngaihsutin, Pasian kimakaih sak lecin na khial ngei kei ding hi. (*Hih thului pen Rev. Thang Khawm Pau’ gelh Zolus Journal No. 12, p. 70-72 pan kiteikhia hi. - TSL*)

LUNG DAM PIH NA

Hih anuaia ZBC Memberte in tunai-in mawtaw neithak uh a, kilungdampih mahmah hi.

- 1. *Pa Gin Suan Mung* s/o Upa Dong Hang (L), Vapar Sumo
- 2. *Tg. P. Muan Thang* s/o Pa Suan Thang, Champhai R-15 (Bike)
- 3. *Pa Zohming* h/o Nu Nian Ngaih Man, Champhai Auto Rickshaw
- 4. *Tg. Pau Lian* s/o Pa Vung Za Kap, Champhai Pulsar (Bike)

THU TUAMTUAM

Lungdam ko :

ZBC sunga Ph. D. degree a ngak thak, Rev. G. K Nang in lungdam kohna pawl August 14, 2010 niin Shillong ah bawl hi. Amau innkuan September kha ciangin a om nading uh Andhra Pradesh ah pai sawm cih thu kiza hi.

Commonwealth Games :

Hong tung ding October 3-14, 2010 sungin India gam khuapi New Delhi ah XIX Commonwealth Games tung ding hi. Hih hunah sum zat ding (budget) pen Rs. 30,000 Crore ahi hi. Hih hunah games et theih nading a ticket neite in metro tuan nadingin a ticket uh zang thei pah ding uh hi. Ahonna leh a khakna hunah sum zat ding pen Rs. 150 Crore hi a, Rs. 5 Crore pen music siam minthang A. R Rahman in music a bawl na man ding hi a, balloon ading Rs. 40 Crore a koih uh pen mi'n tamsa lua uh hi. Hih hunah duty dingin Union Home Ministry ngetna bangin Tripura State Rifles, battalion khat (mi 1000 khawng) sawl ahiah ding Tripura Police Director General, Pranay Sahaya in gen hi. Commonwealth pen hun khat laia Britist kumpi in a uk gamte kipawlkhopna hi a, tuin member 53 om hi. (1 Crore = 10,000,000).

India gamah Khristian :

India gamah 2001 kisimpi ah mihing 1,166,079,217 om a, tua lakah Khristian 2.3% ahi hi. A percent atuatin Mizogam ah tampen a 90.5% omin, Nagaland 90%, Meghalaya 70.3%, Manipur 43%, Goa 26%, Kerela 19%

te in zom hi. India gama Khristian biakinn lianpen St. Cathedral hi a, Goa state a om ahi hi.

Tukum khua lum :

Tu kum 2010 pen leitunga khua lumpen kum ahi hi. US Oceanic and Atmosphere Administration ten kum 1880 pan khua lumdan a ciaptehna pana a muhkhiat uh ahi hi. Tukum a lumlaipen June kha in a taangpi (average) 16.2°C hi a, kum zalom 20 sunga khu lumpen hun (15.5°C) sangin 0.68°C in sangzaw hi. - *Lz. Aug. 10*

Tedim gamah lut nuam :

Chin State leilu lam Falam gam huam Meitei Gun langkhat a teeng Falam kampau khua 10 valte ahi Khuabual, Saihmun, Khawdar, Bochung, Bualmin, Belawi, Khuangmual, Tisen, Bualkhua, Farkhawm leh Zawlnu khuate pen thu tuamtuam hang tawh Tedim gam huam (Tedim Township) sungah lut nuam cih thu kiza. - *ZN.*

Aktui maw upa Akpi :

“Aktui maw upa akpi” cih dotna hanga kinalna tampi piang khin hi. Hih tawh kisai-in Sheffield University a British Scientist, Colin Freeman leh Warwick University a Scientist nih David Quigley leh P. Mark Rodger-te in kum 2003 panin super computer tawh kan uh a, a muhkhiat uh pen, ak suul sunga om protein nam khat ovocledidin - 17 (OC-17) Crystal Nuclei Structural Control panin a pa ci lut loin zong tua a nu ci pen aktui in

piangthei hi, cih ahi hi. Freeman in, “Hun sawtpi sung aktui a upazaw a akigen thei zel pen ‘scientific proof’ mantak tawh akpi mah masazaw hi cih mukhia ta ung” ci hi. - *Lz. Aug 10.*

Migenthei huhna :

Microsoft Company neipa Bill Gates nasepna June kha pana kipan “The Giving Pledge” hang tawh US gam sung a mihausa (billionaire) 403 laka 40 te in a hauhna uh a kimkhat beek migentheite kiangah piak dingin kiciam uh hi. - *VL. 6.8.10*

Leitung a penpente :

Leitung a gam lianpen Russia gam hi a, 17,075,000 sq. km a lian hi a, gam neu pen Vatican City hiin 0.44 sq. km ahi hi. Mihing tampen na gam China hi a, mi 1,338,612,968 om uh a, a tawmnapen Vatican City ah 826 bek om hi. Chinese pau namkhat ahi Mandarin a zang tampen a, mi 873 million in zang a, Spanish 322 million, English 309 million, Hindi 180 million in zom hi. Biakna lamah Christian tampen a, 2.1 billion hi a, Islam 1.3, pawlpi tuam nei lo leh Pasian om a um lo etc. 1.1 billion, Hindu 900 million te in zom hi. (1 million = 1,000,000; 1 billion = 1,000,000,000). - *MNYB. 10*

Naungeek adingin Bawngnawi :

Tunai in Tel Aviv University nuai Department of Pediatrics, Sackler Faculty of Medicine a nasem Prof. Yitzhak Katz leh a seppihte in bawngnawi pana mihing adinga a hoih lo Cows Milk Protein Allergy (CMA), sunglam zuuk, huihdik haksatna, leh natna tuamtuam a piangsak thei pen, naungeek a pian

pana ni 15 sung bawinawi a nete in, a picin uh ciangin tua natna nei lo uh cih naungek 13,013 a sinna uh panin mukhia uh hi. - *Lz. Aug. 10*

Lungkim lohna lak :

India gam, Manipur State sungah Census Operation 2011 a kibawlna ah nisuahna lam a om Manipur singtang gam pawlkhat Bishnupur kici, phaizang bial sungah lutsak dingin Kumpi in vaihawmna nei uh ahih main August 10,2010 (11:00 AM) hunin Lamka khuapi sungah mipi 10,000 val in deihlohna (Mass Rally) nasiatak nei cih kiza hi. - *ZN.*

Namkim za (medicine) :

US National Institute of Allergy and Infectious Diseases ten za (medicine) namkhat, virus pana kikai theih natna tuamtuam a tamzaw damsak nading zawng leh sansiim tungah lawhcing takin ensin uh hi. Hih za pen kum 2013 cianga zat theih dingin lametna a neih thu uh a makaipa Dr. Gary Nabel in gen hi. - *Lz.Aug 10*

Mizogam milip :

2009 Village Level Statistical Index, India kumpi in a saan thakah Mizogam ah mihing 1,098,827 om a, numei 545,835 leh pasal 552,992 om hi. Khuapi sung ah innkuan 107,774 om a, singtang khua ah innkuan 106,932 om hi. Kum 6 (2003-2009) sungin innkuan 43,075 kibeblap a, mihing 176,857 kibeblap hi. - *RI. 2.8.10*

*Editor ngaplo ahih manin manlah takin hong kibawl biangbuang a, khialna a om leh mawhmaina i kingen pah hi.
- Tin Sawm Lian*